

LA FUARCE DAL NESTRI LENGAÇ

Il Friûl, de etât di mieç in cà al à cjapade une filusumie etniche e cun chê un lengaç: i son passâts parsore invasôrs e parons e chest lengaç nol è lâ t pierdût; al à vût dominatôrs todescs, francês, venezians, e il popul al à conservât il so furlan; al è jentrât in relaçions economichis e culturâls cun altre int, ma nol à rinunziât ae sô lenghe; al à vût dafâ massime cui talians di altris regjons e al à imparât ancje il talian ma nol à bandonat il furlan: chest al vûl dî che no si è fondût, no si è messedât, no si è "unificât" tal so spirt cun nissun, al plui si è svicinât. I todescs, sul nestri confin, a fevelin simpri par todesc: al vûl dî che a sin inmò todescs. I sclâfs dal Cuei e dal Lusing a fevelin sclâf ancje se a capissin il talian: al vûl dî che a son inmò sclâfs; chei parsore Tarcint, di Sedilis par esempi, a fevelin mieç par fate: al vûl che là a son lâts a incjasâsi une vore di furlans. Triest e l'Istria a àn bandonât il furlan cuant che sui lôr puarts si son strucjâts tancj forescj che a àn miscliade la int, il costum e la anime.

Pordenon nol fevele plui furlan, di in chê volte che i venits a son diventâts la maiorance de sô popolazion. A Udin e a Gurize si sint a fevelâ dialets bastarts parcè che dal 1866 in ca e je stade vierte - e no par câs - la corentie des imigrazions.

Nol jere stupit il guvier fassist, unitari par ecelence, a fâ di dut par scjafoiâ il furlan: stupits a son chei che a crodin di scjafoiâ il moviment autonomistic ridusintlu a une cusion filologjiche. Scjafoiâit la lenghe e o sês a bon. Pordenon al insegne. Nissune altre fuarce, nissune reson, ni storiche, ni economiche, ni culturâl, ni folcloristiche, e valarà tant a tignî vive la personalitât dal popul furlan come la lenghe. Tant che intai diviers Cjantons de Svizra, come tal Sud Tirôl, come inte Sclavanie, fintremai che e vîf la lenghe e vîf la anime di un popul, e chel popul nol è inmò madûr par nissune "unificazion". La fuarce des armis e la furbarie politiche a podaran metilu dut intun fas cun altre int, ma no varan distudade la sô anime fin che no varan distudade la sô lenghe. Altri che cjacaris di filolics!

E par cheste reson, noaltris autonomiscj di ponte, cun dutis lis dificoltàs che o viodevin e che ogni dì inmò o scugnìn superâ, o vin volût un sfuei inte nestre lenghe da cjâf a piis, e o vin ancje risiervade une part impuartant aes cusion filologjichis; e si lambichin il çurviel par coltivâ e disberdeâ fûr dal so andament dialetâl, il lengaç furlan.

pre Bepo - Patrie dal Friûl - 1946